

4

O R A T I O

D E F I L I I D E I
ET HOMINIS, DOMINI ET
Redemptoris nostri IESV CHRISTI,
præsentia in Ecclesia sua, & Ministerio
Sacramentorum: De communicatio-
ne Idiomatum: De D V P L I C I man-
dicatione Corporis, & bibitione San-
guinis CHRISTI in S. Coena, quæ
in his terris ritè peragitur.

Ex dicto Christi Matth. 28. E G O vo-
biscum sum vsq; ad consummationem
Seculi, omnibus diebus:

Habita

In inclyta vrbis Rosarum Academia, de mo-
re Scholarum. 14. Kal. Iunij. Anno 1573.

A

M E N T O N E G O G R E F E N à Luppfurt, Si-
cambro, S.S. Theol. d. D. Illustri D. Iohanni
Ruebern à Concionibus sacris.

Ad calcem loco corollarj, vberiorisq; Confessionis ergo,
adiecta est sententiâ, brevis, & Fidei analoga, de pernecessa-
ria distinctione, inter hominis corrupti Substantiam, seu
Naturam, & inter peccatum Originis.



Vm Confessionem meam
de præsentia Filij Dei, do-
mini & Redemptoris no-
stri Iesu Christi in Ecclesia
& ministerio Sacramentorum hoc lo-
co edere; Ideoque dulcissimam pro-
missionem & consolationem à Chri-
sto Matth. vigesimo octauo Ecclesiæ
traditam: Ecce Ego vobiscum S V M,
vsque ad consummationem seculi o-
mnibus dieb², pro mea tenuitate enar-
rare in hoc congressu publico à Reue-
rendo & Spectabili domino Decano
iubear: initio meę orationis FILIVM
Dei summum Doctorem & patronum,
custodem & Regem nostrum Iesum
Christum, quem verū D E V M & H O-
M I N E M ac fratrem nostrum, huic ho-
nestissimo coetui Scholastico præsen-
tem interesse & præesse non dubito, si-
cut ipse dixit: Vbicunq; duo aut tres

cōgregati sunt in nomine meo, in medio eorum sum: toto pectore precor, vt hos pulcherrimos cœtus, in quibus vera de ipso doctrina & Confessio sonat & propagatur, clementissimè seruet & protegat, & nos infantes balbutes, qui Testimonium de ipso verum in genere humano aduersus Filij Dei hostes diabolos & ipsorum organa, epicureos & alios blasphemos dicere constanter iubemur, doceat & confirmet, & nunc mei de ipso dicturi mentem & linguam gubernet, vt vera, ipsi grata, & mihi & alijs salutaria dicam. Nec prolixè meam imperitiam aut infantiam, quæ etiam metacente omnibus alioqui nota est, excusabo. Etsi enim de re tanta, præsertim controuersijs multorum fidem & Ecclesiæ concordiam horribiliter turbantibus, implicata, superiorum graduum Doctores in specula Ecclesiæ collocatos audire

dire malim: tamen cū ad reddendam
omni petenti de ea, quæ in nobis est, fi-
de & spe, cum mansuetudine & reue-
rentia rationem parati esse debeamus,
& scholæ leges ac officium obedientię
legibus & præceptoribus debitum,
hanc dicendi necessitatem mihi im-
ponant, reuerenter parere decreui, præ-
sertim cum in veteri etiam Ecclesia &
Synagogis hic ordo seruatus sit, vt plu-
res suo loco, ordinè, grauiter & mode-
stè dicerent, & de quæstionibus subin-
de incidentibus sententias conferrèt,
& sedentes, vt Paulus nominat, Senio-
res & cæteri pij delecti, & idonei iudi-
carent. Vtinam vero nunc quoque de
rebus grauissimis in Ecclesia motis a-
manter & placidè colloqui, & confer-
re inter se eruditi & pij doctores ve-
lint, & controuersias multorum fidem
labefactantes, & Religionem nostram
ludibrio aduersarijs exponentes, tan-

dem diiudicent & præcidant, sed hoc infelici seculo mundi fatifcentis & fatui, seu potius furiosa voluntatum distractione & peruerfitate, vix inter eiusdem Ecclesiæ & Scholæ collegas in eodem oppido tantum beneuolentiæ & fidei mutuæ est, vt apertè & candidè inter se conferre de rebus necessarijs audeant: Cum pietatem & sapientiam præ se ferant plerique hoc vno, quod alios impietatis condemnent, & obseruent alij aliorum errata & calamitates, non vt condoleant, sed vt exprobrent: non vt sanent, sed vt contumeliosè obijciant, & aliorum vulneribus & næuis exaggeratis, scelera tegant & defendant sua, sicut Nazianzenum de suæ ætatis miserijs grauissimè conqueri meministis, sed relicta hac quamuis iustissima querela, consolationem potius à Filio Dei domino nostro IESU CHRISTO resuscitato ex morte, & paulò

paulò ante Ascensionem in coelum re-
petente institutionem Ministerij E-
uangelij Matthæi 28. de qua dicere in
præsentia iussus sum, audiamus. Data
est mihi omnis potestas in cœlo & ter-
ra, Ite igitur & docete omnes gentes
baptizantes eos in nomine Patris & Fi-
lij & Spiritus sancti, docentes eos ser-
uare quæ præcepi vobis; & ecce Ego
vobiscum S V M omnibus diebus vsq[ue]
ad consumationem seculi. Cum enim
Filius Dei finem facturus visibilis con-
suetudinis & familiaritatis cum Apo-
stolis in his terris, denuò mandata de
propagando Euangelio, & colligenda
Deo per Ministeriũ verbi & Sacramen-
torũ Ecclesia eterna ex omnib[us] gentib[us]
repeteret: præmunit & confirmat Apo-
stolos & õnes ministros, difficultatem
& picula huius legationis consideran-
tes & sollicitos, quib[us] rationibus & au-
xilijs aduersante omnem diabolorum

Tyrannorum in mundo sapientia &
potentia docere Euangelion, & colli-
gere ac retinere Ecclesiam possint:
Adfirmans sibi Messiaë, Domino & Re-
demtori ac Regi ecclesiæ omnem po-
testatem in cœlo & terra datam esse, se
omnibus creaturis potentio-rem, verũ
ac omnipotentem **DEVM & HOMI-
NEM**, nõ in cœlo solum omnipoten-
tia sua & gloria fruiturum esse, sed verè
etiam in his terris perpetuò adesse Mi-
nisterio Apostolorum, & per illud di-
uina potentia efficacem esse, destrue-
re peccatum & mortem, restituere iu-
stitiam & vitam æternam, se colligere
& seruare in hac vita Ecclesiam, & re-
primere potentiam & furorem diabo-
li & mundi, & postea æterna gloria Ec-
clesiam ornaturum esse. Magno igitur
& excelso animo, confisi huius nostri
Ducis & custodis omnipotentis po-
tentia & auxilio, doceamus & propa-
gemus

gemos Euangelion, & pericula ac impressiones hostiles, ab hoc Imperatore nostro omnipotente auerti à nobis & depelli sciamus. Non enim posset genus humanum, ac præcipuè imbecillum Ecclesiæ agmen, vnum diem manere incolume, nisi Filius Dominus & frater noster IESVS CHRISTVS, data sibi omni potestate, in his terris præfens, contra diaboli potentiam & mundi totius furores, illud protegeret & seruaret. Cum autem ideo potentiam & præsentiam in Ecclesia suam Christus hoc in loco alleget, vt nobis auxilium & consolationem promittat, ac vt nos in tanta varietate periculorum priuatorum & publicorum ab ipso auxilium petamus & expectemus; Nunc quoque harum promissionum & consolationum cogitatione fidem & inuocationem in nobis exuscitemus, & petamus ardentius, vt nunc quoque o-

A v

mnipo-

omnipotentiam & præsentiam suam in
defensione veræ doctrinæ & piorum
studiorum declaret. Vespera iam venit
nobiscum Christe maneto. Extingui
lucem nec patiare tuam. Defende &
serua Ecclesiam Christe fili Dei viui,
Emanuel & frater noster, quæ vndique
oppugnatur & deformatur, nō tantum
à diabolis & Turcis, (qui quotidie la-
ti⁹ grassantur,) & tyrannidis Idolorum
Pontificiorum defensoribus, qui acer-
bissimis odijs aduersus pios ardent, e-
osq; crudeliter trucidant, verum etiam
varijs dissidijs & scandalis à nostra in-
firmitate ortis, cum multi doctores i-
psi priuatis & ambiciosi certaminib⁹
Ecclesiam dilacerant, ac distractiones
vulnerum, quæ sanare debebant, maio-
res ipsi faciunt. Quid in his spectacu-
lis cogitare aliud humana ratio potest,
nisi paulò post veram doctrinam in his
Ecclesijs sonantem, & studia huius do-
ctrinæ

Strinæ funditus interituram esse, sicut
in Asia & Africa CHRISTI doctrina
deleta, Mahumetici furores iam mul-
tis seculis grassati sunt?

Itaque vt aliarum rerum humana-
rum instabiles & perpetuæ vices sunt:
sic Religiones quoq; nunquam diu in
eodem statu permanere sapientes exi-
stimaunt, sed subinde alias extinguunt, &
oriri alias. Cum tenerent Chaldæi im-
perium Babylonicum, celebrabatur i-
bi Belus. Deinde Alexandri Magni vi-
ctoria Iouem Olympium inuexit. Po-
stea Euangelio per Apostolos propa-
gato, Christi religio aliquātiſper man-
sit. At prouincijs illis per Saracenos
occupatis præcipua sedes blasphemix
Mahometicæ in Babylone collocata
fuit. Ita res ipsa nostris etiam tempori-
bus ostendit mutationes imperiorum,
Religionis quoq; & Ecclesiarum mu-
tationem secum trahere. His specta-
culis

culis mouentur multi, vt existiment
omnes religiones pariter esse RVMO-
RES vacuos, verbaque inania, & parem
sollicito fabulam somnio: Et Christi
doctrinam, vt gentiũ delyria, interire.

Præuidens igitur Christus acerrimè
pugnare diabolum turbantem impe-
ria, Ecclesias, dogmata, & tristissimas
in toto genere humano confusiones ef-
ficientem, præcipuè hoc consilio, vt
deleat totam Ecclesiam Dei, huic tan-
to periculo opponit hanc promissio-
nem & consolationem: Ecce Ego o-
mnipotens conditor & conseruator
Ecclesiæ, Filius Dei, redemptor & frater
vester VOBISCVM SVM præsens,
diligo, curo, defendo, iuuo & seruo Ec-
clesiam, & vos in ea, ne ab vllis infero-
rum portis euerti aut labefactari que-
at. Et si enim visibili specie non ampli-
us versabor vobiscum: tamen reuera
semp vobis adsum, aderoq; in omni æ-
ternitate:

ternitate: Sicut ab initio Ecclesiæ semper generi humano adfui, & Ecclesiam aduersus similes mundi furores mirabiliter defendi. Recepi primos parentes enarrata ipsis promissione de semine contrituro caput diaboli: sedi ad clauum in arca Noë, cum tota Ecclesia funditus extincta videretur. Fui conuiua Abraham, qui cum videret diem meum, lætatus est. Ostendi me Iacobo in illa ipsa facie naturæ humanæ, quam postea assumpturus eram. Apparui Moyse in rubo, mirabiliter seruauī & auxi Ecclesiam sub Pharaone, comitatus sum Israëlitas in deserto. Aspexi Dauidem in forma hominis, qui sum Iehoua in excelsis, de quo inquit Dauid: Osculamini filium Dei, Beati omnes qui confidunt in eo: & Salomon: Quod est nomen Dei aut filij ipsius? Verbum Dei clypeus sperantium in se. Ego adflaui & rexi omnes Prophetas.

ccs. Seruauī

Seruauī Ecclesiam in exilio Babylonico, eamque restitui. Denique cum expletum est tempus à Deo definitum, adsumpta humana natura, caro factus sum, & palàm ac visibiliter inter vos habitauī ac conuersatus sum. Nunc visibilem consuetudinem vsq; ad finem mundi depositurus, nihilominus vobis **V B** Iq; præsens adero, vos curabo, defendam, iuuabo, & ex omnibus periculis & morte ipsa liberatos in cœlum transferam, vbi in omni eternitate vobiscum ero, & meo conspectu, luce, sapientia, iustitia, vita & gloria diuina vos complebo. Hanc dulcissimam pmissionem & consolationem in dicto Christi, Ecce Ego **V O B I S C U M S U M** vsque ad consummationem seculi, attentè considerare, & in tantis periculis & confusionib⁹ Ecclesiæ, humano consilio inextricabilibus **F I D E M** statuentem certò à Filio Dei duce & protectore

rectore nostro omnipotente seruari,
restitui, & regi Ecclesiam, harum pro-
missionum cogitatione confirmari:
& inuocationem accendere: & in pe-
riculis ac ærumnis Christiana mansue-
tudine & patientia ostendere se in præ-
sencia Filij Dei placidè adquiescere,
atque ita hanc promissionem & con-
solationem pijs nectare & melle suaui-
orem ad vsum transferre, multo vtili-
us est, quàm de modo præsentia & com-
municatione Idiomatum, de quo nec
veterum patrum, nec recentiorum scri-
pta satis conueniunt, prophanas dispu-
tationes & rixas, à quibus magno cum
dolore FILIVS Dei longissimè ab-
est, mouere, & ea peruestigare, quæ, vt
Augustinus inquit, vix fortassè à man-
suetè quærentib⁹, à contentiose autem
certantibus nunquam inuenientur.
Sed quia confessionem edere etiam de
hoc certamine iubeor, palàm profite-
or, me

or, me etsi inuitus in hoc certamen ante
pertractus docui & scripsi, idq; ad-
huc verè sentio & confiteor, **VBIQVI-
TATEM** illam, qua humana natura
Christi, eodem modo, quo **DIVINI-
TAS** per se **VBIQ;** atque adeo infini-
ta esse, vel instar alutæ, extensa, & vbiq;
diffusa creditur, in sacris literis **FVN-
DAMENTA** non habere, & doctri-
nam de vera præsentia corporis Chri-
sti in terra ex verbis institutionis cœ-
næ præcipuè sumendam esse, Tamen
palàm, vt dixi, profiteor, me vero cor-
de credere, & ore confiteri, **FILIVM
DEI DOMINVM nostrum IESVM
CHRISTVM verũ DEVM & Homi-
nem ex duabus & in duab⁹ naturis sub-
sistentem**, cui omnis potestas in cœlo
& terris data est, verè & totum ubique
præsentem esse, ac vt clarius & sine vl-
la ambiguitate dicam, credo Christi
carnem non tantum in cœlo, verum-

etiam

etiam in terris vbique, ac multo magis vbicunque cœna celebratur, verè adesse, non quidem per sese & absolute extra Christi personam, sed quatenus cum verbo FILIO Dei, qui vbique est, & in cœna præsertim nostræ salutis causa seipsum sistit, hypostaticè vnita est. Hæc si nimis fortasse breuiter alicui comprehensa esse videbuntur: paulò vberiore declarationem adiungam. Et si enim hæc mysteria verè ὁρατὰ & humanæ rationi inuestigabilia futuræ illi & æternæ Academiæ, in qua arcanum consilium de Redemptione, & modum mirandæ ἐνώσεως καὶ κοινωνίας ἰδιωματῶν diuinæ & humanæ in Christo naturæ coràm cernemus, integrè explicanda relinqui deberent: Tamen cum arx & caput Religionis Christianæ & totius fidei ac salutis nostræ fundamentum vnicum & immotum sit DOMINVS

B

& re-

& redemptor noster IESVS CHRI-
STVS, in cuius personæ & officij ag-
nitione æterna vita, & beatitudo o-
mnium piorum posita est: necesse est i-
nitia eius doctrinæ in verbo Dei tradi-
ta fideliter à nobis disci & retineri.

Credo itaque & confiteor cum san-
cta œcumenica synodo Chalcedonen-
si, vnigenitum Filium Dei Dominum
nostrum IESVM CHRISTVM ante
secula quidem de Patre genitum se-
cundum diuinitatem; in nouissimis
autem diebus eundem propter salutem
nostram ex Maria virgine natum, se-
cundum humanitatem, vnum eundem
Christum, Filium, dominum vnigeni-
tum, ex duabus & in duabus naturis, di-
uina & humana ἁσυχύτως ἀτρέ-
πτως, ἀδιαιρέτως, ἀχωρίως,
hoc est, inconfusé, immutabiliter, in-
diuisé, & inseparabiliter agnoscen-
dum, NVSQVAM SVBLATA dif-
ferentia

ferentia NATVRARVM, propter v-
nionem, sed magis salua proprietate
VTRIVSq; NATVRÆ, & in vnam
personam atque existentiam concurren-
te. Quandoquidem non conuersione
diuinitatis in carnem, nec carnis
in diuinitatem; sed assumptione Hu-
manitatis in DEVM, non confusione
aut transfusione substantiæ, aut vnus
tertiæ naturæ compositione, sed vni-
tate personæ seu ὑποστάσεως, VNVS
est manetque CHRISTVS in duabus
consistens naturis.

Hanc mirandam copulationem du-
arum naturarum in Filij Dei hyposta-
si factam, ita vt secunda PERSONA
Diuinitatis seu Filius Dei LOGOS &
humana natura in vtero Mariæ virgi-
nis assumpta, vnam tantum personam,
seu vnum indiuiduum CHRISTVM
constituant: In scholis nominant vni-
onem Hypostaticam seu personalem.

B ij propter

Propter quam proprietates etiam omnes, & actiones & passionēs, quæ alteri tantum naturæ originaliter congruunt, toti personæ Christi in concreto verè communicantur, sicut tota scriptura proprietates & actiones non singulis naturis seorsim in abstracto, sed toti personæ filij Dei IESV CHRISTI in concreto tribuit. Estq; non Grammatica tantum Idiomatum communicatio in persona Christi. Cum enim eadem sit Hypostasis vtriusque naturæ, attributa vni & eidem personæ Christi conueniunt, nec alia quàm vera communicatio Idiomatum in persona Christi esse potest. Ab eo enim, quod res est, vel non est, oratio vera aut falsa dicitur. Quòd si non verè vtriusq; naturæ proprietas personæ tribuitur, vera prædicatio esse non potest. In multorum ore iam versantur appellationes Dialecticæ & Physicæ communica-

municationis Idiomatum, quas ego
quidem nusquam vsurpari & defendi
à quoquam hætenus legi.

Sed tamen distinctionem inter Idio-
mata seu attributa diuinæ naturæ as-
sumptis, & humanæ naturæ assumptæ
diligentissimè orthodoxa antiquitas
conseruauit. de quo in formula cōcor-
diæ Cyrilli & patriarchæ Antiocheni
dicitur; **DEVS VERBUM** ea quæ diui-
na sunt, contulit assumptæ naturæ; eorū
autem quæ humana sunt, nihil accepit.
Et apud Damascenū, qui copiosè hanc
doctrinam illustrauit lib. 3. Diuinitas
ipsa quidem proprias glorificationes
carni communicauit, ipsa verò manet
ἄμετοχος expers passionū carnis.
Et apud Eusebium: **DEVS VERBUM**
ea quæ sua, seu diuina sunt communi-
cavit homini: Ea verò, quæ mortalis
naturæ propria sunt, non recepit, & di-
uinam quidem potentiam mortali na-

turæ impertiuit. Non autem vicissim
ad consortium mortalitatis natura
VERBI detracta est. Sic Augustinus
contra Felicianum ait: Iniuria sui cor
poris affectam non fateor Deitatem,
sicut Maiestate Deitatis glorificatam
nouimus carnem. Necesse est enim fa
teri, multa siue dona, siue prerogatiuas,
siue ὀξίωματᾶ, aut proprietates, aut
Maiestatem nominemus, CHRISTO
Homini in sacris literis communica
ri & reuera tribui, quæ nostrorum cor
porum physicas proprietates longis
simè excedunt & superant, videlicet
quòd humana natura in Christo vera
& eadem adoratione cum diuina in
uocatur & colitur.

Quòd caro Christi per vnionem cū
verbo viuificatrix facta est: Quòd par
ticeps & socia facta est victoriæ & glo
riæ Filij Dei in toto opere Redemptio
nis, in delendo peccato & morte, in re
stituenda

stituenda iusticia & vita eterna: quòd
euecta est ad dexteram Dei patris o
mnipotentis, & exaltata super omni
nomen, quod nominatur. Quòd tra
dita est ipsi omnis potestas in cœlo &
terra: Quòd contra vniuersæ naturæ
ordinem natus est ex virgine: Quòd
penetrauit ianuam clausam, ambula
uit in mari, ascendit super omnes cœ
los, & vbique Ecclesiæ præsens adest
& communicatione carnis & sangui
nis sui in sacra cœna vbiuis locorum
administrata corporaliter quoque in
nobis habitat, vt Cyrillum expressè lo
qui meminimus. Quæ omnia etsi
physicis nostrorum corporum propri
etatibus longissimè discrepant; tamen
Christo Homini in sacris literis ex
pressè tribui & verè congruere certum
est.

Quòd verò ad meam de sacra cœna
Confessionem attinet, breuiter eam

quam iam antea edito scripto coram
tota ecclesia Christi testatam feci, repe-
to. Simpliciter .n. iuxta verba veracis
& omnipotentis filij Dei testatoris cre-
do, & sine omni fuce palàm confiteor,
Vbicunq; in his terris coena domini-
ca iuxta institutionem & mandatum
Christi feruatur & peragitur, non nu-
dum panem & vinum, sed etiam verū,
vium, substantiale, & efficax corpus
Iesu Christi, quod pro nobis in mor-
tem tradidit: & verum, viuum, essen-
tiale, & efficacem ipsius sanguinem,
pro peccatis nostris in ara crucis effu-
sum, verè & realiter præsentem esse, ita
vt cum pane & vino benedicto, non
typicum, vel absens corpus, vel illius
efficacia & beneficia solummodo, sed
verè & realiter præsens, nobis, à Chri-
sto ipso, per manus ministri, exhibea-
tur, nec tantum ore spiritali, sed eti-
am ORE corporis percipiatur, non
solum

solum à pijs & sanctis, verumetiam ab indignis & hypocritis: A pijs, sanctis, bonis & dignis quidem, O R E, & fide in salutem, ab indignis verò Hypocritis & malis, O R E, ad iudicium & damnationem; iuxta Diui Pauli doctrinam. Hæc inquam hætenus fuit, adhuc est, & in posterum Deo volente & auxiliante, vsq; ad extremum halitum vitæ meæ ærumnosæ, erit & manebit mea fides, doctrina & confessio de sacra synaxi. Nec me ab hac confessione abducit argumentum illud plurimùm in disputationibus horum temporum tractatum, quod velut Gorgonem multi propriæ & natiuæ verborum institutionis cœnæ Domini sententiæ, & veræ ac reali in sacra cœna corporis & sanguinis Christi præsentie opponunt. Eius enim p̄spicua explicatio ex illis, quæ hætenus summa sequens fastigia rerum, recensui, sumi potest. Sic autem

quidam opponunt :

Impossibile est verum & naturale corpus eodem tempore simul in pluribus & diuersis locis, multo minus vbiq; verè & substantialiter præsens esse. Christus verum & naturale corpus humanum, physico loco circūscriptum assumpsit, quod post resurrectionem visibiliter in cœlum ascendit, & sedet ad dexteram Dei, vnde venturus est iudicare viuos & mortuos :

Ergo impossibile est Christum vero corpore suo, quod nunc in cœlo circūscriptum certo & definito loco, sedet ad dexteram patris, simul eodem tempore in his terris, pluribus & diuersis in locis, vbi cœna administratur, præsentem esse aliter, quàm per Alleo-
fin, seu Enallagen, seu communicatio-
nem Idiomatum, seu synecdochen, vt
videlicet Christus filius Dei verè & sub-
stantialiter præsens in cœna dicatur
esse

esse sua Diuinitate, non secundum humanam naturam, quæ tam pcul abest, quàm coelum à terra distat.

Ad hanc speciosam obiectionem respondeo: Primùm, vt notæ Musicæ valent, quælibet in suo systemate; ita Maiorem, etsi in physicis certum ἁξιωμα sit: tamen in Theologia falsam esse, & repugnantem isti principio doctrinæ & fidei Christianæ: Non est impossibile apud Deum omne verbū. Potest igitur Deus, quidquid verbo suo affirmat & promittit, etiam contra, & supra vsitatum naturæ ordinem, certò & re ipsa præstare. Vtrumq; autem in suo verbo affirmat CHRISTVS, & se verum hominem esse, per omnia fratribus similem absq; peccato, & se corpus & sanguinem suum nobis in coena sacra verè exhibere. Vtrunque igitur verissimum esse & certò præstari, non
dubitemus,

dubitamus, Nec ignotas esse sapientiæ
& omnipotentia Dei vias & rationes,
quibus corpus suum, absque substan-
tiæ illius interitu simul in diuersis lo-
cis cœna vtentibus certò exhibere pos-
sit. Deinde etiam si vera esset Maior de
nostris corporibus non vnitis Diuini-
tati omnipotenti, & vbique præsentī,
vnione personali: tamen Christi car-
nem, quæ vnione hypostatica, & indif-
solubili fœdere V E R B O omnipoten-
ti iuncta, & ad dexteram Dei super o-
mne nomen, quod nominatur exaltata
est: multis admirandis & ineffabilib⁹
prærogatiuis & viribus præ alijs huma-
nis corporibus præditam & ornatam
esse nullum est dubium. Vt enim viui-
ficatrix est Christi caro, & cum λόγῳ
vna adoratione inuocatur & colitur,
& pari Maiestate cum æterno Patre
regnans, omnem potentiam in cœlo
& in terra obtinet: ita etiam in pluri-
bus

bus & diuersis locis, eodem tempore, iuxta verbum & promissionem suam vbique & verè præsens esse potest.

Deinde ad Minorem respondeo: Ascensionem Christi in coelos, & sessionem ad dexteram patris non tantum certi loci mutationem esse, vt cū auicula humi sedens in cacumen arboris, aut turris fastigium euolat, nec tantū finem visibilis in hoc mundo conuersationis esse, & depositionem infirmitatum, quas in his terris similes cæteris hominibus, solo peccato excepto, circumtulit, verumetiam exaltationem in cœlesti & diuina Maiestate & gloria, significare, qua sedens ad dexteram Dei Patris omnipotentis, Dominus omnium creaturarum, & caput Ecclesiæ suæ, omnia sibi subiecta habet, & omnia in cœlo & terra præsens gubernat, sicut Petrus Actor. 2. hos articulos declarat: Non Dauid ascendit
in cœ-


coelum. Dicit autem: dixit Dominus
Domino meo, sede à dextris meis. Et
Paulus Ephe. 4. Ascendit super omnes
coelos, vt omnia impleret. & multò il-
lustrius cap. 1. Deus collocauit Chri-
stum ad dexteram suam in coelo super
omnem principatum, potestatem &
dominationem, & omne nomen quod
nominatur, non solum in hoc seculo,
sed etiam in futuro; Et, omnia subiecit
sub pedibus eius: &, ipsum dedit ca-
put super omnia ipsi Ecclesiæ, quæ est
corpus ipsius, plenitudo ei⁹, qui omnia
in omnibus adimplet. Etsi autem in ar-
ticulo de coena Domini rectissimùm
est, fundamenta confirmationis veræ
sententiæ peti ex perspicuis & disertis
verbis Christi veracis & omnipoten-
tis, quibus coena instituta est: tamen
cum aduersarij à simplicitate verborũ
Christi ad alias quæstiones multò sub-
tiliores & obscuriores causam abduxe-
rint,

rint, donec appellatione coeli etiam & mansionum coelestium certa & circumscripta loca, longissimè à terris remota, significari contenderent, vbi Christus etiam cum suo corpore (quod tanto interuallo, quantum coelum à terra distat, à cœna Domini in his terris administrata abesset) versans, nequaquã in cœna Domini præsens adesset: Necessè est nos his etiam rixis, quantumuis inuitos, temporis aliquid & studij tribuere, quod multò vtilius in materias ad ædificationem verę pietatis, timoris Dei, fidei, inuocationis, obedientię erga Deum & Magistratum, dilectionis & beneficentię erga proximum, patientię in cruce vtilis assiduè inculcandas collocatur. Sed maior amplitudo est harũ materialium, quæ nulliꝝ angeli aut hominis eloquentia exhauriri possunt: quàm vt in hac tēporis angustia euolui queant. Itaq; desino, & filiũ
Dei

Dei, Dominum nostrum Iesum Chri-
stum, fontem omnis sapientiæ oro, vt
ipse veram personæ & beneficiorum
suorum agnitionem, & testamenti sui
doctrinam in nostris mentibus accen-
dat & obsignet, & Maiestatem ac glo-
riam suam aduersus veterum & recen-
tiorum furores tueatur & defendat.

D I X I.

BREVIS, NERVO-
SA, CONSTANS, ET PERPE-
tua sententia ac confessio Catholi-
cæ Ecclesiæ CHRISTI.



Quid ex verbi Dei Analo-
gia, & summo consensu,
piè sentiendum, verè sta-
tuendum, salutariter cre-
dendum, constanter pronuntiandum,
& ad gloriam Dei confitendum sit,
DE PERNECESSARIA DI-
STINCTIONE NATVRÆ HV-
MANÆ CORRVPTRÆ, ET PEC-
CATI ORIGINIS, contra tetram,
& blasphemam Manicheorum, Operis
Dei, & diaboli in homine, confusio-
nem; qui omnem rerum delectum &
discrimen tollentes, totam RELIGI-
ONEM Christianam, in omnibus &
singulis capitibus, labefactare, & ab i-
psius fundamentis euertere conuellere.

C que

que, miris nituntur modis & technis:
Distinctio constituenda, & facta tecta
ab omni veteri & recenti Manichæ-
orum confusione, & **CONFUSO DIS-**
CRIMINE, studiose conseruanda,
inter corruptam hominis naturam, &
Peccatum originis, quo authore di-
abolo, & consentiente primo homine,
TOTA humana natura, vnà cum o-
mnibus suis summis, medijs, & infimis
partibus, potentijs, viribus, facultati-
bus, proprietatibus, bonis atque orna-
mentis, non **PHYSICE**, sed **THEO-**
LOGICE, extremè corrupta, depra-
uata & deformata, est, qua firmissimè,
& constantissimè, ex **VERBO DIVI-**
NITVS reuelato, & monumentis Pro-
phetarum & Apostolorum contento,
statuimus, testamur & profitemur;
aliud, non tantum à prima hominis
origine, & conditione, qua nondum
vllum peccatum in mundum intraue-
rat,

rat, sed etiam post lapsum primorum
parentum, esse & manere hominis sub-
stantiam, naturam & essentiam, à Deo
creatam; & aliud P. O. à diabolo or-
tum, & inuectū: & dextrè, iuxta idem
verbum, & inde extractam Christianæ
fidei A N A L O G I A M, diiudicantes,
& discernentes opus Dei, ac opus dia-
boli in homine: nullo quidem homi-
ne, sed S O L O C H R I S T O autore &
duce; scriptura verò sancta, S O L A
Magistra, non re quidem, quantum in
nobis est, sed cogitationibus, & verbis,
minimè arte confictis, aut exturbidis
lacunis Philosophorum, vel Sorboni-
corum Doctorum, petitis: quæ subito
transuolent animum: Sed ex diuini-
tus patefacto verbo desumtis, eoque
ipso conformatis, ex S O L O, inquam,
merito C H R I S T I, destruentis poten-
ter opus diaboli, & in integrum resti-
tuentis, hîc inchoatiuè, post modo ve-

rò, in altera ac beata vita, perfectè &
consummatuè, OP V S S V V M in ho-
mine, discriminamus, secernimus, &
quasi separamus ac determinamus
PECCATVM ORIGINIS, à recre-
atorum per & propter CHRISTVM
substantia, natura & essentia: Quæ di-
stinctio, secretio, & separatio Peccati
originis à Substantia, Natura & Essen-
tia renouatorum, seu redintegratorũ,
in hac quidem vita à Spiritu Sancto,
virtute & efficacia æterni Christi me-
riti, per verbum & Sacramenta à Chri-
sto instituta, in electis & vocatis in-
choatur, ac fide suscipitur, & retinetur:
continuanda, perficienda & consum-
manda, post Resurrectionem mortuo-
rum in illa altera beata vita: In qua
non modò animæ nostrę post mortem
superstites, Domini Dei conspectu, in
tranquilla pace, & gaudio fruuntur;
verumetiam corpora nostra, in morte
obdor-

obdormientia, & in puluere terræ putrefacta ac consumpta, certo reuictura, & instaurata, ac vnà cum animabus suis, ab omni peccato & morte integrè liberata, & ab omnibus corporis mortalis sordibus defœcata, rursus domicilia animarum suarum futura sunt: ita vt, receptis **IISDEM** corporibus, quæ merse quidem prius letho, habebunt viuum glorificata decus; & **EADEM** **CARNE**, quam nunc circumferimus: & penitus ab omni peccato, labore, & dolore liberi: semper cum Domino victuri simus, fruantes conspectu, sapientia, luce, iustitia, & beatitudine Diuinitatis, & vicissim Deum in omni æternitate celebrantes.

Rom. 7.

Noui non habitare in me (id est, in carne mea) bonum.

